

# IXCARTA SAN PABLO NIMA TZOKNILH FILEMON

## Pablo huaní kalhén Filemón

**1** <sup>1</sup> Aquit Pablo tí ctanuma cpulachín caj ixlacata Cristo y quintacamcán Timoteo ccamalakachaniyán jaé carta huix quintacamcán Filemón tí clakalhamanáu porque quincatascuján. <sup>2</sup> Na ccalacapastacáu quintacamcán Apia, y quintacamcán Arquipo tí makahuaní ixtachihuín Dios na chuná la aquín, y namá cristianos tí talipahuán Cristo y tatamakstoka nac mínchic. <sup>3</sup> Quinticucán Dios y quimpuchinacán Jesucristo cacaxcixilhlacachín y cacamaxquín lipaxáu latámat huak huixín.

## Filemón calakalhamán ixtacristianos

<sup>4</sup> Aquit siempre clacapastacán acxni ckalhtahuakaní Dios y cpaxcatcatzíní tú tlahuanit milacata <sup>5</sup> porque quilitachihuinancanit la tancs lipahuana Jesucristo y calakalhamana huak tí talipahuán Dios. <sup>6</sup> Aquit cmaksquín Dios tí calakalhamanita camaktayanita catalilacahuánalh la huix tancs lipahuana Cristo xlacata natamakachakxí la quincaxcixilhlacachinán tí lipahuanáu. <sup>7</sup> Quintacam Filemón, aquit snun cpaxahuá y ni cakatuyún pues ccatzí la capaxquiya cristianos y lhuhua tí talipahuán Cristo takalhi licamama nac ixnacujcán porque calakalhamana.

## Pablo lacatitayá ixamigo Onésimo

<sup>8</sup> Quintacam Filemón, huix catziya aquit quililhcanit Cristo nacliscuja y tlan xaclimapaksín tú militláhuat. <sup>9</sup> Pero ni clacasquín y mejor camán licxilán para xlicana quilakalhamana la aquit clakalhamanán. Aquit kolutá y ctanuma nac pulachín caj ixlacata Cristo, <sup>10</sup> chí camán cliakaxculiyán chatum tí climanú quinkahuasa porque cmalipahuánilh Cristo juú nac pulachín huanicán Onésimo. <sup>11</sup> Milh quilhtamacú namá Onésimo nitú limacuanín, pero chí sculujua lanit y tlan quincamacuaniyán la huix y la aquit. <sup>12</sup> Huá climalakachaniyán, icamakhtinanti nac mínchic la aquit caquimakhtinanti!

<sup>13</sup> Aquit xactilakátih catamáxtakli milakapuxoko juú xlacata naquimaktayá, pues como ctanuma nac pulachín caj ixlacata ixtachihuín Dios ni lá ctaxtú. <sup>14</sup> Pero ni ctaclhcapútulh quicstu porque qué tal para ni matlaniya. Para huix ixlihuak minacú chú lacpuhuana camalakacha, pero ni clacasquín capúhuanti tamaclacasquiní naquimalakachaniya.

<sup>15</sup> Cpuhuán Dios limáxtakli akxtakmakanán laktzú quilhtamacú xlacata chí tlan namakhtinana y natalatapaya canicxnihuá porque lipahuán Cristo. <sup>16</sup> Chí pat makhtinana la yaj chatum tasacua tí

ixtamahuanita, yaj pat licxila la mintasacua, chí pat licxila la chatum mintacam tí nalakalhamana. Aquit snun clakalhamán la xlicana quintacam, pero huix mininiyán mas nalakalhamana porque liscuján lata makán y xahuá litanú quintacamcán porque chí lipahuán Cristo.

<sup>17</sup> Filemón, para huix quilimanuya miamigo camaklhtinanti la caquimaklhtinanti aquit. <sup>18</sup> Para tú ni tlan tlahuaninitán o tú linyán aquit caquimataji. <sup>19</sup> Aquit Pablo quimacán cama litzoka tú cama huaniyán: Aquit naxokó tú linyán. Pero pula camán malacapastacayán caáksanti tí litachihuinán Cristo xlacata nataxtuniya y chuná quitaxtú la lhuhua tú quilipiniya. <sup>20</sup> Quintacam Filemón, aquit ccatzí huix lipahuana Cristo y clipahuanán pat tlahuaya tú cliakaxculimán. Camakapaxahua quinacú huix tí lipahuana Cristo.

<sup>21</sup> Aquit cmalakachaniman jaé carta porque ccatzí pat kaxpata tú cuanimán y pat tlahuaya mas lata tú cmaksquimán.

<sup>22</sup> Na cliakaxculiyán calaccaxtlahua ní nactamakxtaka porque claclhcanit nacanachá calakpaxialhnanán, pues huixín chú maksquinitantit Dios.

<sup>23</sup> Tahuaniyán kalhén Epafra, xlá quintatanuma nac pulachín caj ixlacata Cristo, <sup>24</sup> Marcos, Aristarco, Demas y Lucas tí quintamaktayá nac quintascújut.

<sup>25</sup> Quimpuchinacán Jesucristo cacaxcixilhlacachín huak huixín. Chuná calalh, amén.